

ISCARTA YA' SAN PABLO YATO TET MAKTA AYXAKO YUL ISQ'AB' KOMAM DIOS B'EY COLOSAS

Yicheb'anil iscarta ya' Pablo

1 ¹⁻²Hanin Pablo inti'an, ischejab' Komam Jesucristo wehan. Ha' Komam Dios aq'nhe hune' inmunilti'an, yuto hak tu' el yinh isk'ul. Ha' hun juxhta Timoteo chiwettz'ib'nhentojan hune' carta ti' teyet hex wuxhtaj hex wanab', hex yet hexxa Komam Dios yeb' kaw yijem hex tet Komam, hex ay b'ey yul konhob' Colosas. Ha'ojab' Komam Dios chi'aq'ni aq'ank'ulal yeb' isk'ulch'anil isk'ul teyet hunun hex.

Txahli ya' Pablo yinh makta ayxako yul isq'ab' Komam Jesucristo b'ey Colosas

³Hunta el yet chonhtxahliahn teyinh kaw chijaq'anh yuch'andiosal tet Komam Dios, Ismam Komam Jesucristo, ⁴yuto jab'ehanh isq'umal tato kaw ayko heyanna yinh Komam Jesucristo, yeb' xin tato kaw xahan cheyil sunil makta ayxako yul isq'ab' Komam. ⁵Hak tu' cheyute, yuto ayexiko heyechman hune' hematan ay b'ey yul satkanh. Yettax heyab'en Tzoti' K'ul yet Kolb'anile kaw yel chala, hatax tu' heyichiko heyaniko hune' tu' yipo heyanna. ⁶Hune' kuyb'anile halb'ilxa heyab'e', kaw lanhan ispujnakanh yab'elaxilo yul hunun konhob' yul sat yib'anhq'inal ti'. Kaw xin ay isk'ulal chakanøj. Haka'tik'a yu texol yet heya-b'enilo isk'ulch'anil isk'ul Komam Dios, yeb' xin heyohtanhelej ta kaw yeli.

⁷Ha' juxhta Epafra kexkuynikano yinh hunteq'an tu', kaw xahankano ay naj juhanh yuto kaw jet munlawomal kob'ahanh yeb' naj. Kaw yijem chiyute isb'a naj ismunla yinh tzet chal Komam Jesucristo texol. ⁸Ha' naj halni jetanh tato kaw xahan cheyil heb'a yu Komam Espíritu Santo.

⁹Yuxin hayet jab'enanh heq'umal tu', kaw mach chikob'ejanh ko-txahliahn teyinh. Chikoq'annihanh tet Komam Dios tato kaw chi'aq'lax

hehelanil yeb' henab'al yu Komam Espiritu Santo, kat heyohtanhenilo sunil tzet choche Komam teyinh. ¹⁰Hak tu' xin chu heb'eyb'alnhen tzettaj chisb'eyb'alnhe makta yetxa Komam Dios Jahawil, yeb' hewatx'en tzet choche isk'ul, yeb' hewatx'en sunilal isk'ulal, yeb' xin heyohtanhenilo Komam yinh kaw k'ul.

¹¹Kaw chonhtxahlihanh teyinh, haxinwal ha' Komam ch'aq'ni heyip helinhb'an heb'a yu hune' yip Komam kaw aykano yelapnoj, hak tu' xin kaw chexq'oji istecha sunil heyu, yeb' kaw ay henimank'ulal. ¹²Yeb' xin cheyaq' yuch'andiosal tet Komam Dios yinh kaw tzalahilal, yuto xayaq' Komam toholb'oko konab'al yuxin ay jok yinh kochahni komajul yinta makta yetxa Komam Dios yehi, ayxako xol sajilq'inal. ¹³Ha' Komam kolnhehonhilo yul isq'ab' q'ejholo, konhyaniko yul isq'ab' Komam Jesucristo, Isk'ahol kaw xahan ay yu. ¹⁴Ha' Komam tu' xin, kolnhehonhilo yet iskam yinh te' kulus, yaq'nikano tanho komul yu iskamikal tu'.

Ayonhxako yinh aq'ank'ulal yeb' Komam Dios

¹⁵Waxanhka mach chijiliko yinh Komam Dios, yaj Komam Jesucristo Isk'ahol Komam Dios tu' yenhelo Komam jet, yuto kaw Diospaxo Komam Jesús. Ha' Komam b'ab'el yeb' ek'b'al yelapno yib'anh sunil tzet watx'e-b'il yu Komam Dios. ¹⁶Yu Komam Jesucristo tu', iswatx'e Komam Dios sunil tzet ay yul satkanh yeb' sunil tzet ay yul sat yib'anhq'inal ti'; sunil tzettaj chijiliko yinh, yeb' sunil tzettaj ye tu' mach chijiliko yinh. Yu Komam, Isk'ahol Komam Dios xin, iswatx'e Komam Dios sunil mak ayko yahawiloj, yeb' sunil mak kaw ay yip, yeb' sunil mak ayko iswi'ehaloj. Yu Komam Jesucristo yuxin watx'i sunil tu'. ¹⁷Ayxatik'a Komam Jesucristo yalanhto maxhto chiwatx'i sunil yul sat yib'anhq'inal ti', yinh xin Komam tzab'an sunil tzettaj ye tu'. ¹⁸Iswi'ehal yeko Komam jinh kosunil ayonhxako yul isq'ab', yuxin isnimanil Komam jehi, ha' Komam yicheb'anil. Ha' Komam b'ab'el itzitzb'ikanh xol anma kamom, yuxin ek'b'al yelapno ye Komam yib'anh sunil. ¹⁹Kaw sik'leb'il tz'ajan yekaniko Komam Dios yinh Komam Jesucristo, yuto hak tu' chiyoché isk'ul Komam.

²⁰El yinh isk'ul Komam Dios tato yu Komam Jesucristo hunxanhe chiyukano sunil tzettaj ye tu' yinh Komam, sunil tzet ay yul satkanh yeb' tzet ay yul sat yib'anhq'inal ti'. Yuto kam Komam Jesucristo yinh te' kulus, yel ischik'il Komam, hak tu' xin yu yokkano sunil yinh aq'ank'ulal yeb' Komam Dios.

²¹⁻²²Yet payxa, hex ti' kaw nahat heyehilo yinh Komam Dios, yu istx'ojal tzet chewatx'e, yuxin chikajtza heyanna yinh Komam. Yaj wal tinanh xin, ayexxako yinh aq'ank'ulal yeb' Komam yu iskamikal Komam Jesucristo, yet yaq'lax ek'oya' yanma yinh te' kulus. Hak tu' yute Komam yunhe hayet cheyeni heb'a yinh sat kaw matxa nino hetx'ojal, yeb' matxapaxo nich'ano hemul yuto kaw yetxa Komam heyehi. ²³Yaja'

kaw yilal helinhb'an heb'a yinh kaw istoholal yinh hune' chab'ilxayto yul heyanna. Mach chepohilo heb'a yinh tzet ayxako yipo heyanna yu tzoti'al yet kolb'anile xaheyab'e. Ha' ton hune' tzoti' yet kolb'anile tu' chihal-laxik'o sunil yul sat yib'anhq'inal ti'. Hanin Pablo inti'an, ha' huninan chejb'il hinan walnik'ojan.

**Chejb'il ya' Pablo yu Komam Dios ismunla xol
anma ayxako yul isq'ab' Komam**

²⁴Wal tinanh xin, kaw chintzalahan yu hanta ch'ek'ya' wanmahan heyu, haka'ojtam lanhan intz'ajb'anan yinh innimanilan hantato isya'tajil mach yaq'le Komam Jesucristo yinh isnimanil. Yaq'le Komam Jesucristo isya'tajil ju hanhoh ayonhxako yul isq'ab' ti', yuxin isnimanilxa Komam je tinanh. ²⁵Ha' Komam anheinikojan munil xol anma ayxako yul isq'ab', yunhe hewatx'iko yinh isk'ulal, yeb' xin yunhe inpujb'anik'ojan Istzoti' Komam Dios yinh haka' kaw yelapno yehi. ²⁶Ha' ton hune' tzet mach ohtab'iloj hune' ewan ye yu Komam Dios yettax maxhto yul sat yib'anhq'inal ti', yaja' wal tinanh xin xayaq' Komam johtanhelo hanhoh yetonhxa ti'. ²⁷Kaw el yinh isk'ul Komam yaq'ni ohtanhelaxo hanta is-saq'alil isq'alomal iq'b'il yu hune' ewantik'a ye teyet hex mach Israelo hex ti'. Ha' hune' tzet ewan tu', ha' ton Komam Jesucristo chi'ehik'o teyinh, yuxin ayko yipo kok'ul ta yu Komam Jesucristo chikochah isk'ulal tet Komam Dios.

²⁸Yuxin ha' Komam Jesucristo kaw chijalik'ojan tet sunil anma kat kokuynihan, kat jalnihanh sunil helanile tet. Yuto kaw chijochehanh tato chitoholb'iko isnab'al hunun anma yinh Komam Cristo. ²⁹Yuton hune' ti', yuxinto kaw chiwaq' wanmahan inkuynikantojan sunil anma yu yip Komam Jesucristo chikolwa winhan.

2 ¹Kaw chiwochehan cheyohtanheloj tato kaw lahb'iliko wuhan inmunlahan heyu, yeb' yu eb'naj juxhta ay yul konhob' Laodicea. Yeb'paxo yu makta ayxako yul isq'ab' Komam maxhto b'ay chiliko winhan hunelaj. ²Kaw chinmunlahan yunhe yiq'ni yip heyanna, yeb' yunhe hunlahanxanche hexahannhen heb'a hesunil. Chiwochehan kaw helan chexelkaniko yinh yet Komam Dios, yunhe kaw heyohtanhentanilo mak hune' mach ohtab'ilo yet yalanhtokanoj, ha' ton xin Komam Jesucristo. ³Ha' yinh Komam Cristo chi'ilchalo sunilal isk'ulal helanilehal yeb' nab'ale.

⁴Chiwaltojan hunteq'an ti' teyet yunhe machi mak chexaq'ni sub'chaho yu monteb'al tzoti', yuto ay mak ti' kaw helan chutekano isb'a. ⁵Waxanhka machijinan texol, yaja' ayexiko yinh ink'ulan, haka'ojtam ayinikojan texol. Kaw chintzalahan yet chiwab'enan tato kaw k'ul heb'eyb'alnhen tzet choche isk'ul Komam, kaw cheyapaxiko heyanna yinh Komam Jesucristo.

⁶Yuxin haka'tik'a yu hechahni Komam Jesucristo yul heyanna, hak tu' xin cheyutepaxo heb'eyb'alnhen tzet chal Komam. ⁷Haka' hunu te te' kaw kaw yekanayto xe' yul tx'otx' saq'al isch'ib'i hak tu' cheyute heb'a yinh Komam Jesucristo, linhb'awe heb'a heyanniko heyanna yinh Komam haka' yu yaq'laxkano hekuyb'anil, kat xin heyaq'ni yuch'andiosal tet Komam Dios yinh hunun tz'ayik.

Hune' koak' q'inal yinh Komam Jesucristo

⁸Cheyil heb'a xin, mach cheyaq' sub'chaho heb'a tet eb'naj choche kex-yaq'a' sub'chahoj, chalni eb'naj helanile yet yul sat yib'anhq'inal ti', yeb' kuyb'anile maxhtaj yekoj, yuto maxhtaj yinh Komam Jesucristo chilo eb'naj hunteq'an tu'. Wal xin hanhetik'a iskuywab'al yichmam eb'naj chilayala, yeb' kuyb'anile yet yul sat yib'anhq'inal ti'.

⁹Wal xin ha' sunil tzet ye Komam Dios, kaw tz'ajan yekaniko yinh Komam Jesucristo, ¹⁰yuxin kaw tz'ajan yekanayo isk'ulal Komam Dios jib'anh tinanh, yuto hunxa je yeb' Komam Jesucristo. Ha' Komam ayko yahawilo yib'anh hunteq'an ayko yahawiloj yeb' ay yip, hunteq'an mach chijiliko yinh.

¹¹Yuxin kaw ayxako circunciación teyinh tinanh, yuto kaw hunxa heye yeb' Komam Jesucristo. Yaj maxhtaj hune' circunciación chi'ok yinh konimanil chiwalan, wal xin hune' circunciación chitit yinh Komam Jesucristo yinh konhiskolni yul isq'ab' istx'ojal ayko jinh. ¹²Hayet yahkano ha' he-wi', kaw hun yu hemujlax yeb' Komam Jesucristo yul sat Komam Dios. Yeb'paxo xin hun yu heyitzitzb'ikanh yinta Komam, yuto kaw heyayto yul heyanna yinh Komam Dios aq'ni itzitzb'ikanh Komam Jesucristo.

¹³Hayet yalanhtokanoj, kamnajexilo yul sat Komam Dios yu hetx'ojal yeb' yu mach circuncidado heyehi. Yaja' tinanh, kaw hun yu yaq'nikano Komam Dios heq'inal yeb' Komam Jesucristo. Yuxin yu Komam Jesucristo yuxin yaq'kano tanho Komam Dios sunilal komul. ¹⁴Ay hune' tzet haka' kok'as ayko jib'anh yet yalanhtokanoj yuto machi koyije hunteq'an ley. Yaja' Komam Dios aq'ni tanho hune' kok'as tu'; yilo Komam jib'anh yuto pahlaxiko Komam yinh te' kulus yu ch'en lawuxh. ¹⁵Hayet iskam Komam Jesucristo yinh kulus tu' xin, yaq'ni ayk'ayo Komam hunteq'an yahawil yeko yu naj matzwalil. Isyenikanilo Komam yinh sat anma tato elkano is-pixan hunteq'an tu' yinh hunelnhe. Hak tu' yu isyenilo Komam tato q'oji Komam yinh naj matzwalil.

Kaw yilal kosaynilo tzet ye tu' ay satkanh

¹⁶Yuxin, ta choche eb'naj Israel cheyije ishab'al eb'naj haka' yinh tzet chilolaxi, yeb' yinh tzet chi'uk'laxi, yeb' yinh tz'ayik kaw txahul yul sat eb'naj, maka yet chipitzk'a ixahaw, maka yinh tz'ayik xewilal; kaw mach chechah heyab'e. ¹⁷Yuto sunil hunteq'an tu' yechelnhe yinh tzet xahul

koxol, ha' isyelal yechel tu', ha' ton Komam Jesucristo. ¹⁸Mach cheyaq' hamanih hekachlax hechahni hematan chaq' Komam Dios, yu heyab'ento tzet chiyal eb'naj teyet. Chal eb'naj tu' ta kaw yijem eb'naj, chiyo isb'a eb'naj tet eb'naj ángel, chalni eb'naj tato ay tzet chisyeko isb'a yinh sat eb'naj. Kaw komonnhetik'a chisnime winajnhe isb'a eb'naj yinh tzettaj chi'ek' yinh isbab'al. ¹⁹Ha' eb'naj tu' mach hune'nheho ye eb'naj yeb' Komam Jesucristo, Komam iswi'ehal yeko jinh. Ha' Komam Cristo chi'-aq'ni jip, chonhishunb'akano kosunil haka' hunu nimanile tzab'leb'il isb'a isxijil yu istx'anhal; chonhyaq'ni ch'ib'o Komam, yuto hak tu' chi'el yinh isk'ul.

²⁰Wal hex hex ti', kamnaj hexxa yinta Komam Jesucristo yul sat Komam Dios, yuxin matxa ayexikto yalanh chejb'anile yet yul sat yib'anhq'inal ti'. Yaja' ¿tzet yinh yuxinto haka'to anma yet yul sat yib'anhq'inal ti' cheyute heb'a? Cheb'eyb'alnhen hunteq'an kuyb'anile chalni haka' ti': ²¹«Txahul yokniko hune' ti' heyu, maka xahan heloni hunteq'an ti', maka hetzab'ni hunteq'an ti',» xhi. ²²Wal xin hunteq'an kuyb'anile tu' yet anmanhe yehi, nixhtejal istanhiloj yet chi'okniko yu anma. ²³Yeli hunteq'an kuyb'anile tu', kochantanhe ha' yehi, yuto chala ta chiko kach kob'a yinh ej tzet ye tu', yeb' ta chijiyo kob'a, kat kokachni konimanil yinh ej tzet ye tu', yaja' mach chikolwa yinh janma yinilo istx'ojal chocheto konimanil.

3 ¹Wal tinanh, yu xakonhitzitzb'ikanh yeb' Komam Jesucristo yul sat Komam Dios, yuxin kosaya'welo kowatx'en tzet ye tu' yet yul satkanh yehi, b'ay tz'onhan Komam Jesucristo yinh iswatx'q'ab' Komam Dios. ^a ²Kaw yilal janiko konab'al yinh tzet ay yul satkanh, matxahojab' chijako konab'al yinh tzettaj ye tu' ay yul sat yib'anhq'inal ti'. ³Hayet iskam Komam Jesucristo, hanhhunonh konhkampaxo yintaj, yuxin koak' q'inal yeb' Komam Jesucristo kaw k'uwana yu Komam Dios. ⁴Ha' Komam Jesucristo koq'inal yekoj, yuto hayet chisyeno isb'a Komam, kat koyelaxpaxilo yinta Komam. Hak tu' chiyu istz'ajnakanih kok'ulal haka' isk'ulal Komam.

Hune' icham b'eyb'ale yeb' hune' ak' b'eyb'ale

⁵Wal tinanh xin, awekano sunil b'eyb'ale yet yul sat yib'anhq'inal ti', haka' ixloj, maka winajloj, yeb' sunil tzettaj kaw machiswalil, yeb' tzettaj istx'ojal chilaheyochejoj. Mach cheyako heyanna yinh q'alomal, yuto hune' tu' chu yok hediosalo selelo Komam Dios. ⁶Mak chito watx'en hunteq'an tu', kaw chitit ishowal Komam Dios yib'anh, yuto mach chisyije yinh tzet chal Komam. ⁷Sunil hunteq'an ti' hewatx'e yet yalanhtokanoj, yet ayextoko xol anma chilawatx'en hunteq'an tu'. ⁸Yaj wal tinanh xin,

^a 3:1 Sal. 110:1

b'ejwepaxkano sunil hunteq'an ti'; ischiwa hek'ul, yeb' istit hehowal, yeb' henaniko istx'ojal yinh hunuxa heyet anmahil, yeb' heb'uchwahi, yeb' tzoti' tx'oj chi'elti yul heti'.

⁹Kaw mach cheyako leq'ti'al teyet hunun hex, wal xin kaw matxa aye-xokto yalanh yip hune' icham b'eyb'al iq'b'iltik'a heyu yeb' hunteq'an istx'ojal chewatx'e yet yalanhtokanoj. ¹⁰Yaja' wal tinanh xin, haxa hune' ak' b'eyb'ale iq'b'il heyu, lanhan istoholb'iko henab'al, yunhe lahanxa chexeliko yeb' Komam Dios, Komam konhwatx'eni, kat heyohtanhenilo Komam yinh kaw k'ul.^b ¹¹Wal xin machi yok yinh mak anmahil, waxanhka Israel maka machoj, waxanhka chab'ilxa circuncisión yinh isnimanil maka machoj. Waxanhka nan konhob'al, waxanhka xin mach kuywomoj, waxanhka yet isb'a ischukil, maka k'amte'; kaw mach chiyok hunteq'an tu' yinh, ha' hune' kaw yilal to yetonhxa Komam Jesucristo kosunil, Komam ek'b'al niman yelapnoj, kaw xin ayko Komam yul janma.

¹²Wal xin, kaw ocheb'il hex yu Komam Dios, sayb'il hex yu Komam yu heyokkano yeto Komam. Kaw tz'ayojab' hek'ul yinh heyet anmahil, kaw k'ulch'anojab' cheyute hek'ul, chewchotanhehojab' cheyute heb'a, machojab' chexhowb'i, ayojab' henimank'ulal. ¹³Kaw nimanojab' cheyute hek'ul teyinh hunun hex, aq'we nimank'ulal teyinh. Tato ay hex cheyako hemul teyet, haka'ojab' yu yaq'ni nimank'ulal Komam Jesucristo Jahawil yinh sunilal komul, hakojab' tu' chu heyaq'nipaxo nimank'ulal teyinh hunun hex.

¹⁴Ha' hune' kaw yilal yehi, xahan cheyil heb'a hunun hex, yuto ha' hune' koxahannhen kob'a, ha' chonhhunb'anayo yinh isk'ulal Komam. ¹⁵Ha'ojab' hune' aq'ank'ulal chiyaq' Komam Cristo chi'ijb'an heyanna, yuto yu hune' tu' yuxin awteb'il hex yu Komam Dios, yunhe hune'xanche nimanile cheyukanoj. Aq'we yuch'andiosal tet Komam Dios yinh hunun tz'ayik.

¹⁶Kaw chiwochehan tato kaw hunelnhe chukaniko Istzoti' Komam Jesucristo yul heyanna. Yinhojab' kaw helanil chekuyulekanto heb'a, kat hekachni heb'a. B'itnhewe isb'i Komam Dios yu Salmos, himnos yeb' b'it chipitzk'ati yul heyanna. ¹⁷Sunil tzet chewatx'e yeb' sunil tzet cheyalpaxoj lahanojab' haka' tzet choche Komam Jesucristo. Aq'we yuch'andiosal tet Komam Dios yu Komam Jesucristo.

Yinh tzet wal isb'eyb'alnhen makta ayxako yul isq'ab' Komam Dios

¹⁸Hex ixale, yijewe tzet chal heyichamil, yuto kaw ayexxako yul isq'ab' Komam Jesucristo. ¹⁹Yeb'paxo hex ichamile, xahan cheyil heyixal, mach howo cheyute heb'a yinh eb'ix.

²⁰Yeb'paxo hex uninale, yijewe yinh sunil tzet chal hemam hemi', yuto kaw chitzala Komam Dios yinh haka' tu'. ²¹Hex mame mi'e hex ti', mach

^b 3:10 Gn. 1:26

cheyaq'tij ishowal heyuninal yinh isnab'nhehal, haxinwal machi kab'konkanh isk'ul.

²²Haxa hex k'amte' hex, yijewe yinh sunil tzet chal heyahawil yul sat yib'anhq'inal ti'. Machojab'nhetaj yet t'anhaniko eb'naj teyinh saq'al hemunlahi, yunhe kaw k'ul cheyukano yul sat eb'naj. Wal xin sunilobjab' heyanna chexmunlahi, xiwanhwej yuto kaw chil Komam Jesucristo tzet chewatx'e. ²³Sunilobjab' tzet chewatx'e, yinh sunil heyanna chewatx'eni, hakojtam ha' tet Komam b'ay lanhan heyijeni, maxhtaj tet anma. ²⁴Kaw johtaxa tato chiyaq' Komam komatan hanhohh yuninalonhxa ti', yuto ayonhiko kowatx'en haka' tzet choche isk'ul Komam Jesucristo, Komam Jahawil. ²⁵Wal mak chiwatx'en istx'ojal xin, chischah ispaj sunil tzet machiswalil chiswatx'e tu' tet Komam Dios. Yuxin tzet chilaiswatx'e hunun anma, hak tu' ispaj chi'aq'lax tet yu Komam Dios.

4 ¹Hex yahaw munil kaw k'ulojab' cheyute heb'a, yeb' watx'ewe is-toholal yinh hek'amte'. Nawepaxtij tato ay hune' heYahawil ay b'ey yul satkanh.

²Txahlanhwe yinh hunun tz'ayik, majwahanhwej, aq'we yuch'andiosal tet Komam Dios. ³Txahlanhwepaxo jinhanh haxinwal chisye Komam b'aytu'wal chijalik'ojanh Istzoti', hune' Tzoti' ewan ye yinh Komam Jesucristo. Yu Istzoti' Komam tu' yuxin ayinikojan preso. ⁴Txahlanhwepaxoj yunhe walnik'ojan hune' kuyb'anile ti' xol anma yinh kaw haka' yelapno yehi.

⁵Kaw k'ulojab' cheyute heb'a xol mak maxhto ayoko yul isq'ab' Komam. Mach nab'nheho chi'ek' hetieempo. ⁶Hayet chextzotel tet anma, ha'objab' tzoti' kaw k'ul cheyal tet, hunteq'an tzoti' kaw chiyoche yab'e', yeb' xin tz'ajanojab' cheyute hek'ul hetxumnilo tzet chu heyaq'ni ispaj isq'amb'eb'al chiyaq' teyet.

Yalto ya' Pablo ta chil isb'a eb'naj juxhta ay b'ey konhob' Colosas

⁷Naj juxhta Tíquico, kaw xahan ay naj wuhan, kaw yijemkano naj yeb' kaw chikolwa naj wintajan yinh jalnik'ojanh Istzoti' Komam Dios. Ha' naj chi'inipaxto tzoti' teyet yinh hanik' wehikojan b'ey ti'. ⁸Yuxin chiwatojan naj ilwal teyinh yunhe yalni naj teyet hanik' jekojanh, kat xin kexyip-tzenpaxo naj. ⁹Chitopaxo juxhta Onésimo yetb'iho naj, naj ti' kaw xahan ay naj juhanh, kaw yijem naj yinh tzet chal Komam Dios, heyet konhob'-paxo naj. Ha' eb'naj xin chihalni teyet tzettaj chiyu b'ey ti'.

¹⁰Naj juxhta Aristarco ayko preso wintajan b'ey ti', chiyalpaxto naj ta cheyil heb'a yinh hekawil yeb' xin juxhta Marcos, ya' yuxhtato isb'a yeb' ya' Bernabé. Xaheyab'e isq'umal ya' Marcos ti', tato chi'apni ya' kexistukle' b'ey tu', chahwe ya' yinh kaw k'ul. ¹¹Chalpaxto juxhta Jesús ta cheyil heb'a yinh hekawil, naj chiyijpaxo Justo. Hanhk'anhe eb'naj ti' xol eb'naj Israel ayxako yul isq'ab' Komam chikolwa wintajan yinh

walnik'ojan kuyb'anile yinh tzet chu yok anma yul isq'ab' Komam Jesucristo. Kaw xin ayko eb'naj ti' yipo wanmahan.

¹²Chalpaxto juxhta Epafra ta cheyil heb'a yinh hekawil, naj ischejab' Komam Jesucristo, kaw heyet konhob'paxo naj. Aynhetik'ako naj istxahli teyinh yunhe kaw toholnhetik'a cheyute heb'a, yeb' xin yunhe tz'ajan chiyij isb'a sunil tzet chal isk'ul Komam Dios teyinh. ¹³Testigo hinar yinh tato ayko yinh isk'ul juxhta Epafra teyinh yeb' yinh eb'naj juxhta ay b'ey yul konhob' Laodicea, yeb' xin eb'naj ay yul konhob' Hierápolis.

¹⁴Yeb'paxo xin juxhta Lucas anhlom, kaw xahan ay juhanh, chalpaxtoj ta cheyil heb'a yinh hekawil; hakpax tu' juxhta Demas, chalpaxtoj ta cheyil heb'a.

¹⁵Halwe tet eb'naj juxhta yeb' eb'ix janab' ay b'ey konhob' Laodicea ta chil isb'a. Halwepaxo tet janab' Ninfas ta chil isb'a, yeb' xin sunil makta ayxako yul isq'ab' Komam Jesucristo chiskutxb'a isb'a b'ey yatut janab' tu'. ¹⁶Hayet chilahwi heyawten hune' hum ti' tet eb'naj juxhta yeb' eb'ix janab', kat xin heyenito te' il-laxo b'ey konhob' Laodicea. Haktik'apax tu' xin, cheyilpaxo te' chati eb'naj juxhta b'ey tu'. ¹⁷Halwe hune' ti' tet juxhta Arquipo: «Ako hawanma hayijen hamunil aq'b'il tawet yu Komam Jesús, Jahawil,» kexchi tet naj.

¹⁸Hanin Pablo inti'an, hankawinan chintz'ib'nhetojan ta cheyil heb'a yinh hekawil. Nawetij tato preso wehan. Yaq'ab'ayo Komam Dios is-saq'alil isk'ul texol b'ey tu'. ¡Hakojab' tu'!